



勿當奴

手記

九月二十六日（星期二）

下午到銅鑼灣勿當奴，個D伙記一個傳一個，好快就同我辦好咗手續。我填報係夜英專中五畢業生，現在一間書局任職搬貨，月入六百元。身旁一個勿當奴仔，便立即說這樣的人工實在係太可耻咯，呢度任何一個女仔，半期糧也差不了多少；我只有靦腆的笑一笑。那位經理問我為什麼要來勿當奴效勞，我照打算好的話回答，因為看見那些勿當奴仔、勿當奴妹做得好開心，我唸我嚟做都會好開心嘅！個個經理都有七嘢表示，只是說到這裏服務要穿制服、黑長褲、黑鞋、要將頭髮剪短、要先去打防疫針，每星期規定要放一日假、生手D人工係每小時港幣二元正，隨時都可以返工啱咯。

古仔

九月二十八日（星期四）

下午到銅鑼灣裁判司署大廈打防疫針，先到四樓移民局辦事處去映快相，但係映快相要入四個舊大銀，當值D女職員當然係有得換啦，只好走落街，都唔知點樣先至可以搵到四個舊大銀，買貴嘢又唔抵，最後想到到報紙檔買份報紙，換咗四個舊大銀，映完快相後，再去打針。我問那位老婆婆護士，唔打針得唔得嘍？佢話要我返去問老板嗶，我只好再話細個陣時有過腸熱病，病好之後聽聞係可以自然免疫個嗶，佢話唔係一百份一百嘅！最後，我只好承認怕痛，唔想打針，而且我重只係做幾日個咗嗶！老婆婆護士佢話：而家D後生仔都咁鍾意話去生活體驗，但係打針都話怕痛，咁就要先體驗一下打針嘅經驗先喇。

然後返屋企攤唯一一條黑色西褲，二十三吋褲腳，唯一一對黑色皮鞋，鞋趂四吋高，中學時代D老土貨。

九月二十九日（星期五）

三號風球。下午看完「油脂」後，在戲院附近買了一包髮夾，將頭髮完全撥後，兩只耳仔重見天日。去到勿當奴，要上工，點知個個着黃色白條裙嘅丫頭，大大聲聲咁話，你D頭髮咁長，唔得，要再剪過返嚟見過我之後至上得工，更用流俐嘅英文話：“THERE IS NO EXCUSE”。

九月三十日（星期六）

真谷氣，不過為咗搵食，只有任由鬍鬚佬替我落髮，兩只耳仔今次玲瓏浮凸啦！上工順利，不過先頭話做四個鐘，經理死都要遊說我做四個半鐘，最後尾重做五個鐘添嗶。咁先至叫一個叫「老鼠」嘅女仔帶我去怡和街換制服，呢個女仔曾經離開過勿當奴，但係又返番嚟做，佢話做落都幾好嗶！佢重大力吹噓勿當奴嘅工作方法添，佢話人地成功係有一定嘅道理嘅，係美國重有五千間勿當奴添嗶。

今日第一日開工，着起件衫，戴埋頂紙帽，成只鴨咁，重要用番個洋鬼名，咁就叫細個時嘅STEPHEN。首先係學整奶昔，大規模生產，話都有咁易。做完四個鐘頭，有半小時嘅“BREAK”可以任揀勿當奴三類食品、甜品、飲品各一種，然後厘埋係倉個度食嘢。同時休息嘅奴仔奴妹，有幾多都係學生嚟嘅，好似新法同埋太古城新開個間學校，就有好多中學生嚟做。

個班奴仔奴妹一邊食，一邊吱吱喳喳，話邊個今晚要留係度做通宵，幫手抹檯，然

後聽日去飲早茶。原來勿當奴為佐獎勵三軍上下，每個月第一個星期日早上都請埋晒班奴仔奴妹去紅寶石飲茶，飲茶當返工兩個鐘頭計算，一樣支薪水，而且茶點免費，不過好似唔係任叫任食啫。但係我第一日返工，而且朝頭早七點鐘去飲茶，一於咪攪。不過，經理都有叫我去，重當我係盲丁奴仔。

第一件事最唔順嘅，就係D奴仔奴妹一味係叫“YES SIR”“YES SIR”。哎，好悶呀！簡直係階級分化！

今日係短短五個鐘頭內，足足整咗五百杯奶昔，以後見到美國奶昔就怕怕喇。

最唔開心嘅就係，返到怡和街大本營之後發覺袋中今日剛出版嘅“號外”和“文化新潮”不翼而飛，那些勿當奴真是有文化、熱中文化的啊！



十月一日（星期日）


三號風球掛了五十多小時，星期日人客顯著減少。

還是整奶昔。顧客多嘅時候，我實行集體生產，十杯十杯的泡製；有一位女管工走來望我，說快沒有用，要一杯一杯的整，要依勿當奴方法做事，我說要快又要好嘛！相持之下，經理拍拍我的膊頭，叫我到貨倉，然後和氣地說，我地勿當奴七撚嘢都要依住HANDBOOK做嘅，做得好唔好唔緊要，最緊要係顧客至上，依勿當奴理論生產，實有錯嘅。

死死地氣，唯有返回奶昔崗位，「磁雞」見我稍為鬆閉，於是叫我洗滌其中一部奶昔機，聲明話唔准見到一條污糟痕嘍。睇佢都機。

磁雞見我又好似有嘢做咁，於是叫我去掃街，聲明話要由松板屋掃到滙豐銀行，唔准見到一條牙簽嘅，好X谷氣，一掃掃了四十五分鐘。

剛掃完了百德新街，正想透一口氣，“磁雞”又驚死我得閒咗，叫我去洗地，我話我要收工啦，有佢咁好氣，二蚊一個鐘，驚死人做唔夠咁！



十月二日 (星期一)

仍然機械式製造奶昔，又要掃地，又要洗地。不過，今日重開始學煎包，又熱又辣，悶極。

個D奴仔奴妹，叫高級D嘅做阿婆阿姨，認親認戚，真係吸收西洋文化之精華。

十一點十分左右，見到兩個警察走入嚟，直入貨倉，我以為發生佐D乜嘢事，嘩一聲，經理話佢日日都嚟喇；話口未完，又有二個入嚟，稍後，我借故到貨倉偷偷望，共有五個差佬，其中兩個紅膊頭，只見又有巨無霸啦、奶昔、大汽水啦……但萍果批係好難好難食嘅！

聽聞話勿當奴嘅現款深夜放入銀行果陣時，係有警察保護嘅，而個D警察可以得到一張一張嘅巨無霸贈券個個。

成日對住個火爐，又熱又悶，奴仔奴妹之間又有溝通，根本就冇乜嘢咁值得開心嘅。放工時，我將褲袋裏寫好嘅七日辭職通知信遞俾經理。

十月三日 (星期二)

做得好冇趣，今晚一於唔返工，於是打電話話大哥俾人拉佐上差館，勿當奴問我屋企重有冇人可以帮手，咁咪可以唔駛告假囉，我急忙地話我係最大嘍……。



十月四日 (星期三)

帶着一股無奈心情回到勿當奴；工作不久，外面的奴妹奴仔忽然哄動，原來有個雜差無緣無故捉住一個串仔，用手扣扣住，那個串仔苦苦地哀求，說明天又要返工，現在又沒有攪乜嘢，冇乜嘢嘢。卒之等到另外一個雜差到來，拉了那個串仔到後門盤問一番，然後放之。

BREAK的時候，碰到一個讀中二的女孩子，她和姊姊一起做勿當奴，她五年前從越南來，父親現在法國，母親在台灣，她們姊弟三人自己看顧自己，啊……。

十月五日 (星期四)

今日做LOBBY，負責處理勿當奴顧客的剩餘食品，每當將一膠袋一膠袋的垃圾從後門送到後巷，就見到一群貓一樣大的老鼠逃竄，好怕人嘞！

BREAK嘅時候，同一批舊嘅奴仔傾起工作表現，佢地都話D新人練精學懶，比唔上佢地果一批舊人，唔知呢D算唔算係戀舊嘅心理。但係佢地話我學嘢比中學生慢一D，就係真嘅。

放工時，搭電車落灣仔，坐在車頭廂，看見「長頸鹿」手捧一疊海報，於是追了下去，居然穿起勿當奴的制服去貼海報。還和妹妹坐在街頭談了大半個通宵。

十月六日 (星期五)

是日勿當奴仔STEPHEN的例假。

十月七日 (星期六)

好捱悶。

有一個奴仔話選ALL STAR TEAM完全係假局嚟，佢話明知自己攞九十幾分，人地、八十幾分都入圍，自己就偏偏名落孫山，吹漲，激氣。今日成日做嘢都有厘心機。

今日都仲係叫我去掃百德新街，我留意到而家嘅女性都穿俾人看見腳趾嘅鞋仔，但穿裙D女仔就幾乎百分之百着絲襪嘞。

今晚BREAK嘅時候，食佐六樣嘢，一於博晒老命。